



Na osnovu člana 24. Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", br. 45/12 - Prečišćeni tekst i 26/14) i Uredbe o finansiranju programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca ("Službene novine Kantona Sarajevo", br. 31/06, 20/09, 20/11 i 16/14), Ministarstvo za boračka pitanja Kantona Sarajevo **raspisuje**

## **JAVNI OGLAS**

### **za podnošenje zahtjeva za dodjelu pozajmica za finansiranje programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca u 2017. godini**

#### **1. Predmet javnog oglasa:**

Podnošenje zahtjeva za dodjelu pozajmica za finansiranje programa za zapošljavanje demobilisanih boraca, vojnih invalida i članova porodica šehida i poginulih boraca sa područja Kantona Sarajevo.

#### **2. Pravo učešća:**

Pravo podnošenja zahtjeva za dodjelu pozajmica za finansiranje programa za zapošljavanje demobilisanih boraca, vojnih invalida, članova njihovog porodičnog domaćinstva i članova porodica šehida i poginulih boraca imaju pravna i fizička lica sa područja Kantona Sarajevo, koja su registrovana za obavljanje privrednih djelatnosti, uz uslov da zaposle jedno ili više lica iz člana 1. Zakona o dopunskim pravima boraca-branitelja Bosne i Hercegovine ili članove porodičnog domaćinstva ovih lica.

#### **3. Uslovi za dodjelu pozajmica:**

- Pravo na pozajmicu mogu ostvariti sva pravna i fizička lica koja otvaraju nova radna mjesta i planiraju zapošljavanje lica iz člana 1. Zakona o dopunskim pravima boraca-branitelja Bosne i Hercegovine ili članova porodičnog domaćinstva ovih lica.
- Pozajmice se odobravaju u visini do 20.000 KM po novouposlenom radniku, a najveći iznos koji se može odobriti po navedenom osnovu za pojedinačni program je 200.000 KM.
- Pozajmice se odobravaju na period od 96 mjeseci (8 godina), u okviru čega je grejs period od 12 mjeseci, sa kamatom od 3% na godišnjem nivou. Od ukupnog iznosa odobrenih sredstava najmanje 50% sredstava plasira se u stalna sredstva, a najviše 50% u tekuća-obrtna sredstva.
- Obezbjedenje urednog vraćanja pozajmice su slijedeći instrumenti:
  - a) za pozajmice do 20.000 KM, institut sudužništva prema bankarskim pravilima i platežnoj sposobnosti istih, i mjenice,
  - b) za pozajmice preko 20.000 KM, založno pravo na nepokretne stvari (hipoteka) zasnovano putem Suda u omjeru 1:2, i mjenice.

#### **4. Podnošenje zahtjeva za dodjelu pozajmice:**

Zahtjevi za dodjelu pozajmice podnose se Ministarstvu za boračka pitanja Kantona Sarajevo, ul. Reisa Džemaludina Čauševića br.1, 71000 Sarajevo.  
Uz zahtjev je neophodno priložiti svu potrebnu dokumentaciju.

## 5. Potrebna dokumentacija:

- Zahtjev za pozajmicu, koji treba da sadrži: puni naziv tražioca pozajmice sa adresom i kontakt telefonom, iznos i namjenu pozajmice, podatke o lokaciji predviđenoj za obavljanje djelatnosti za koju se traži pozajmica, podatke o broju novih radnih mjesta i dosadašnje rezultate poslovanja ako tražilac pozajmice već obavlja privrednu djelatnost;
- Rješenje o registraciji, odnosno kopija sudskog Rješenja ili Rješenja nadležnog općinskog organa o obavljanju određene privredne djelatnosti, a ako se radi o pravnom licu onda i kopija obavještenja Zavoda za statistiku o razvrstavanju poslovnih i drugih subjekata po djelatnostima i o jedinstvenom matičnom broju;
- Kraći biznis plan, koji mora sadržavati: uvodne informacije-osnovne podatke o tražiocu i opis privredne djelatnosti, predračunsku vrijednost i strukturu ulaganja, rezultate dosadašnjeg poslovanja, tržište nabave repromaterijala i tržište prodaje proizvoda i usluga, ekonomsko-finansijsku analizu i izjavu o uspješnosti projekta na bazi procjene za period od osam godina, kao i strukturu potrebnih radnika (stručna sprema i zanimanje);
- Bilans stanja i bilans uspjeha ili prijava Poreznoj upravi za razrez poreza na dobit, za posljednje 3 godine, odnosno za period od registracije-pokretanja privredne djelatnosti, ukoliko je taj period kraći od 3 godine;
- Uvjerenje Poreske uprave da nema dospelih a ne izmirenih obaveza;
- Izjava o ponuđenim instrumentima obezbjeđenja urednog vraćanja pozajmice, u kojoj se treba naglasiti da li je obezbjeđenje urednog vraćanja pozajmice založno pravo na nepokretnu imovinu (hipoteka) ili institut sudužništva, ovjerena u općinskoj službi za ovjeru potpisa;
- Izjava o davanju saglasnosti za korištenje ličnih podataka, u skladu sa članom 5. stav 2. Zakona o zaštiti ličnih podataka („Službeni glasnik BiH“, broj 49/06), ovjerena u općinskoj službi za ovjeru potpisa;
- Dokaz o statusu lica iz člana 1. Zakona o dopunskim pravima boraca-branitelja Bosne i Hercegovine ili članova porodičnog domaćinstva ovih lica;
- Druga dokazna dokumentacija po traženju Ministarstva za boračka pitanja Kantona Sarajevo ili poslovne banke (kao npr.: dokaz o posjedovanju poslovnog prostora, dokaz o posjedovanju nekretnine predložene za hipoteku – ZK uložak bez tereta, procjena nekretnine urađena od strane ovlaštenog sudskog vještaka odgovarajuće struke, izjave sudužnika i dr.).

## 6. Procedura odobravanja pozajmica:

- Po prijemu zahtjeva Komisija Ministarstva za boračka pitanja Kantona Sarajevo za rješavanje zahtjeva za dodjelu pozajmica za finansiranje programa će vršiti provjeru ispravnosti dokumentacije i ispunjenja osnovnih uslova za odobravanje pozajmice po zahtjevima, a nakon toga opravdane zahtjeve sa kompletnom dokumentacijom dostavljati na dalju obradu poslovnoj banci, sa kojom je za ove namjene zaključen ugovor o komisionom poslu.
- Stručna služba poslovne banke će obraditi zahtjeve i svoje stručno mišljenje sa prijedlogom za odluku dostaviti Ministarstvu za boračka pitanja Kantona Sarajevo, koje donosi konačnu odluku po svakom zahtjevu.
- Po odobravanju pozajmice poslovna banka zaključuje ugovor o pozajmici sa korisnikom pozajmice, a sredstva za pozajmicu će biti realizovana i plasirana korisniku u skladu sa odlukom i zaključenim ugovorom o realizaciji pozajmice, nakon što ista budu doznačena od strane Ministarstva za boračka pitanja Kantona Sarajevo na račun poslovne banke.
- Podnosioci zahtjeva kojima se odobri pozajmica (korisnici pozajmice) će biti dužni da u toku trajanja grejs (grace) perioda Ministarstvu za boračka pitanja Kantona Sarajevo dostave urednu dokumentaciju o zapošljavanju predviđenog broja radnika, koji moraju biti lica iz člana 1. Zakona o dopunskim pravima boraca-branitelja Bosne i Hercegovine ili članovi porodičnog domaćinstva ovih lica.

## 7. Sredstva za dodjelu pozajmica:

Finansiranje programa otvaranja novih radnih mjesta planirano je u Budžetu Kantona Sarajevo za 2017. godinu, u ukupnom iznosu od 400.000 KM. Ova sredstva mogu biti umanjena u zavisnosti od ostvarenja prihoda u Budžetu Kantona za 2017. godinu ili iz drugih opravdanih razloga po procjeni Ministarstva za boračka pitanja Kantona Sarajevo.

## 8. Rok za podnošenje i odobravanje zahtjeva za pozajmice:

- Rok za podnošenje zahtjeva za dodjelu pozajmica trajat će od 10.04.2017. godine do 26.05.2017. godine.
- Zahtjevi će se rješavati prema redosljedu prijema, a odobravat će se i realizovati u skladu sa dinamikom obrade istih od strane poslovne banke i dinamikom obezbjeđivanja sredstava planiranih za ove namjene.

## 9. Obavještenja i napomene podnosiocima zahtjeva:

- Zahtjevi iz 2016. godine, koji u proteklom periodu nisu riješeni zbog nezavršene obrade u poslovnoj banci, imat će prioritet u rješavanju, s tim da su podnosioci istih dužni Ministarstvu za boračka pitanja Kantona Sarajevo dostaviti izjavu da ostaju pri zahtjevu uz eventualnu dopunu dokumentacije ili izmjenu zahtjeva.
- Podnosioci nepotpunih zahtjeva iz 2016. godine su dužni iste dopuniti ili podnijeti nove zahtjeve sa kompletnom pratećom dokumentacijom.
- Nepotpuni zahtjevi se neće uzimati u razmatranje.
- Dokumentacija podnesena uz zahtjev se neće vraćati podnosiocu, te se sugeriše podnošenje ovjerenih fotokopija potrebnih dokumenata.
- Uputstvo o načinu dobijanja i korištenja pozajmica za finansiranje programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca se može dobiti u pisarnici Kantona Sarajevo (na info punktu Ministarstva za boračka pitanja Kantona Sarajevo) ili na internet stranici: [www.mbp.ks.gov.ba](http://www.mbp.ks.gov.ba)
- Za sve nejasnoće i konsultacije po osnovu ovog oglasa zainteresovani se mogu obratiti i putem telefona na broj +387 (0) 33/562-008.

Broj: 06-14-14301/17  
Sarajevo, 07.04.2017. god.



web: <http://mbp.ks.gov.ba>  
e-mail: [mbp@mbp.ks.gov.ba](mailto:mbp@mbp.ks.gov.ba)  
Tel: + 387 (0) 33 562-012, Fax: + 387 (0) 33 562-251  
Sarajevo, Reisa Džemaludina Čauševića 1

